

POSIBLES IDEAS PARA
UNHA HOMILÍA CON NENOS
02 XUÑO 2019

ASCENDE para DESCENDER

e quedar todos os días connosco.

1. VER: “Es un ceo”

Ás veces ás persoas que queremos botámoslles un piropo e dicímoslles: “es un ceo”. En certa ocasión preguntáballe a un neno na catequese: que é o ceo?. El respondeume con ousadía: “O ceo ten que ser” a bomba!”. Si, o ceo ten que ser algo grande.

*Que queremos dicir con estas expresións?
Que é para ti o ceo?*

2. XULGAR: Xesús ascende para descender.

+ No evanxeo de hoxe, Xesús *“sobe ao ceo”* e déixanos a nós unha misión: *“Vós sodes testemuñas disto”*.

QUE NOS QUERE DICIR? **Hoxe é o día da Ascensión.**

1. Xesús queda connosco. Ascende para descender, para baixar entre nós. Terminou a misión na terra. Agora é glorificado, constituído Señor de todo e de todos. **Pero SEGUE CONNOSCO: a través do Espírito Santo** (falaremos del o vindeiro domingo), **da Palabra de Deus e dos sacramentos (ver debuxo de Fano).**

2. Déixanos a nós a substitución: agora tócanos a nós SER As súas TESTEMUÑAS, testemuñas da resurrección. “vós sodes as miñas testemuñas”.

-Sexamos as súas testemuñas: testemuña é o que di e fai o que viu, o que experimentou xunto a Xesús.

3. Xesús LÁNZANOS para que a luz da Resurrección chegue a todos os recunchos. “Non vos quededes aí mirando ao ceo”. Válese de nós, pobres instrumentos para dar cor ao mundo, para construír o seu reino. Temos a **misión de iluminar** (ás veces como fachos, outras como simples candeas desgastadas), e **encher de esperanza** o mundo. Trallemos coma se todo dependese de nós; confiemos coma se todo dependese do Espírito que nos mira e impulsa.

Como podes ser testemuña no cole, cos amigos, en familia?

3. ACTUAR: Sede testemuñas cribles de Xesús

- Pensamos en que debemos mellorar o noso testemuño de Xesús para levalo aos nosos ambientes e vivir coma el.

-Dialogamos que facemos nós para construír a Igrexa, a comunidade de Xesús.

-Comentamos como atoparnos hoxe con Xesús nos sacramentos que nos regala o Espírito Santo, como vivilos mellor?

A que te compromete o evanxeo de hoxe? E como grupo?

A PALABRA

Feitos dos Apóstolos 1, 1-11: Vírono elevarse.

No meu primeiro libro, querido Teófilo, escribín de todo o que Xesús foi facendo e ensinando ata o día en que deu instrucións aos apóstolos, que escollera, movido polo Espírito Santo, e ascendeu ao ceo. Presentóuselles logo da súa paixón, dándolles numerosas probas de que estaba vivo, e, aparecéndoselles durante corenta días, faloulles do reino de Deus. Unha vez que comían xuntos, recomendoulles: - **«Non vos afastedes de Xerusalén; agardade que se cumpra a promesa de meu Pai, da que eu vos falei. Xoán bautizou con auga, dentro de poucos días vós sereis bautizados con Espírito Santo.»** Eles rodeárono preguntándolle: - **«Señor, é agora cando vas restaurar o reino de Israel?»** Xesús contestou: - **«Non vos toca a vós coñecer os tempos e as datas que o Pai estableceu coa súa autoridade. Cando o Espírito Santo descenda sobre vós, recibiredes forza para ser as miñas testemuñas en Xerusalén, en toda Xudea, en Samaría e ata os confíns do mundo.»**

Dito isto, vírono elevarse, ata que unha nube llo quitou da vista. Mentres miraban fixos ao ceo, véndoo irse, presentáronselles dous homes vestidos de branco, que lles dixeron: - **«Galileos, que facedes aí plantados mirando ao ceo? O mesmo Xesús que vos deixou para subir ao ceo volverá como o vistes marcharse.»**

Salmo 46:

Deus ascende entre aclamacións; o Señor, ao son de trompetas.

Efesios 1, 17-23 Sentouno á súa dereita no ceo.

Conclusión do santo evanxeo segundo san Lucas 24,46-53: *Mentres os bendicía, ía subindo ao ceo.*

Narrador: Naquel tempo, díxolles Xesús aos seus discípulos:

Xesús: -«*Así estaba escrito: o Mesías padecerá, resucitará de entre os mortos ao terceiro día e no seu nome predicarase a conversión e o perdón dos pecados a todos os pobos, comezando por Xerusalén. Vós sodes testemuñas disto. Eu enviareivos o que o meu Pai prometeu; vós quedádevos na cidade, ata que vos revistades da forza do alto.*»

Narrador: Despois sacounos cara a Betania e, levantando as mans, bendiciunos. E mentres os bendicía separouse deles, subindo cara ao ceo. Eles prostráronse ante el e volvéronse a Xerusalén con gran ledicia e estaban sempre no templo bendicindo a Deus

Palabra do Señor

(Narrador - Xesús)